

四庫全書

集部



欽定四庫全書

石門文字禪卷四

宋 釋覺範 撰

古詩

同敦素沈宗師登鍾山酌一人泉

鍾山對吾戶春曉開煙鬟白雲峰頂泉紺碧生微瀾經  
年未一酌對客愧在顏兩翁亦超放瘦策容躋攀大千  
寄一瞬境靜情亦閑是時天慘愴佳處多遺刪立談共  
嘲謔豪氣破天慳臨川冰玉清風流繼東山茲游適所



願但恨無弓彎東陽邱壑姿癡絕膽亦頑孤坐巉絕處  
掉頭不肯還天風吹笑語響落千崑間歸來數清境但  
覺毛骨寒從君乞秀句端為刻爛斑

敦素坐誦公衮烏白樹絕句嘆愛不已其詩云  
三年逐客弄湘流華氣遮欄兩鬢秋祗有荒  
寒江上樹尚成詩句聚眉頭成此寄之

我不識公衮時時見醉墨愛其吐詞氣人品極英特君  
看句中眼秀却天下白前輩風流盡尚復餘此客世議



隘不容道山歸未得三年謫湘楚妙語敵山色歸來大  
江南聲價長籍籍我亦不羈人夢境聊戲劇要當徑尋  
君已辦登山屐想見一禿翁攫攘吾輩側

提舉范公開軒面鍾山名曰寸碧索詩

湖山煙翠層千葉青蓮折公家蓮萼間如眼不自覲一  
登功名途富貴兩追迫開軒延爽氣拄笏望秀色鍾山  
盤萬丈雲破見尾脊殷勤度邑屋分此一寸碧升空帶  
青小撐漢螺髻出我亦個中人登覽增眼力知公寓逸



想喧不礙岑寂給札令賦詩相顧愕坐客愧無莫雲詞  
浣公雪色壁

次韻彥由見贈

華亭富文物最後機與雲妙年翰墨場唾手立奇勳萬  
物鼻一壘馳掃數揮斤道人出塵者一見過所聞置之  
緇衣林玉石宛自分能將雪溪畫解追青龍氤超然勁  
高節冰雪看此君故應知見熟玉骨久受熏天眼視浮  
俗爭奈空煎焚我尋住山侶識子吳江濱人生各有適



未易分黠黠風物亦自私草木俱忻忻何當斷岸塢賡  
歌蒼石垠我詩無傑句愧子才逸羣此篇頗尚有句意  
雅而文把玩值清月林影白紛紛高懷亦自放豈以我  
輩云君看功名事真如過耳蚊行將挂社籍蓮沼開奇  
芬勞君讀此詩正如猶與薰

與嘉父兄弟別於臨川復會毗陵

君家兄弟萬人傑何止才容誇兩絕憶昨江南山盡頭  
西津渡口曾相別君時慘然纒制中行將扶護歸吳越



我亦買舟還故山，社燕秋鴻那忍說。客中不覺舟壑走，  
邇來飄忽經歲月。毗陵那料又相逢，喜君美髯冰玉類。  
竹軒堆髻話臨川，清論無窮如鋸屑。意消已覺在秋鄉，  
坐令五月失炎熱。歸來喜甚不成寐，起步空庭聽風葉。  
念君姓名懸睿想，吳江未可停舟楫。欲看驂表付王良，  
相鼎煩君為調燮。平生無求任所見，往往撩人面紅冽。  
恃君猶作故人看，此詩聊當名紙謁。

法雲同王敦素看東坡枯木



此翁胃次足江山萬象難逃筆端妙君看壁間耐凍枝  
煙雨楂芽出談笑想當卻立礧礧時醉魂但覺千岳曉  
恨翁樹間不畫我擁衲扶筇送飛鳥併作玄沙息影圖  
禪齋長伴爐煙裊王郎自是玉堂人風流合受鶯花繞  
何為愛此枯瘦疥嗜好果超凡子料為君援筆賦新詩  
詩成一笑塵寰小

送訥上人游西湖

西湖招提三百六佳氣如春在眉目一番雨過吞青空



萬頃無波鴨頭綠望湖樓閣獨自登煙霏向背攢寒谷  
想見襄陽孟浩然此中有句不容續道人生長西山阿  
骨清氣明韻拔俗久居京國壓塵土一夕歸心俊如鵠  
明窗為君研破硯落筆轉頭風雨速龍山深處如定居  
就彼結隣容我卜

送僧游泗洲

濁流一千里快瀉如建瓴解舟東灣橋晝夜不得停忽  
驚萬頃碧一舉當眼青自推舴艋窻出步楊柳汀精神



覺蕭散鶴雛生翅翎僧伽坐閱世層崖登青冥生涯亦  
何有隨處懸盂瓶洗心依老宿湛意終殘經回頭大梁  
夢塵迹俱凋零余亦厭久客行赴東揚舫會宿淮山陽  
話此遭熏蒸看君新句法霜刀新發硎

余過山谷時方睡覺且以所夢告余命賦詩因  
擬長吉作春夢謠

芭蕉莫寒心欲折密燭華光清夜白春風吹夢正扶搖  
關高墮落銀蟾穴青鸞睡穩雲委地桂葉初齊香不關



千門萬戶金碧開時時忽見如花妾心清別殿聞

闕

覺來殷枕哀怨聲月廊花影無人問金鴨香消風

闕

郭祐之太尉試新龍團索詩

政和官焙雨前貢蒼壁密雲盤小鳳京華誰致建溪春  
睿思分賜君恩重綠楊院落春晝永碧砌飛花深一寸  
門下賓朋還畢集碾聲驚破南窗夢高情愛客手自試  
春霧脚縈雪花湧聚觀詩膽已開張欲啜睡魔先震恐  
我有僧中富貴緣此會風流真法供定花磁盃何足道



分嘗但欠纖纖捧七杯清風生兩腋月脇澄魂誰與共  
戲將妙語敵甘寒詩成一弔盧仝塚

戒壇院東坡枯木張嘉夫妙墨童子告以僧不  
在不可見作此示汪履道

雪裏壁間枯木枝東坡戲作無聲詩雪川謫仙亦豪放  
酒闌為吐煙雲詞鬪傳秀色絕今古正如四月出盆絲  
老僧遮護不許見敲門游客遭慢欺我來擬看亦乘興  
興盡却還君勿嗤



次韻太學茂千之

君詩清絕若冰壺讀之六月失煩暑我雖好吟無逸才  
空有千篇俗於土料君肺腸飽清秋馭風騎氣無何游  
投毫欲和先噪吻詩源慳澀勞披搜吾廬題者徧今古  
今古當以君為優我今即死且無愧先生未識真吾羞  
蔡老有志好學識面于京師作此示之

道人西嶽來氣與秋爭曉讀書如壁月罅隙必委照當  
從賢俊游運斤端得妙儻明句中眼王良控騷裏嗟余



老漸衰綠髮亦加少喜君解妙處見博而知要錄余一  
千篇正可付一笑同歸漳水垠乘月答清嘯睡起山花  
開脫履萬事了

金陵吳思道居都城面城開軒名曰橫翠作此  
贈之

醉穩琴無絃乃得琴中意詩髯軒無山而有看山味青  
山隨意有那復問城市醉眼看雉堞便覺是橫翠因以  
名吾軒坐卧增爽氣春花解言語風松中宮徵我來不



能辨夕陰滿窗几頗怪靈鷲峰顛狂復飛至清嘯呼白  
猿愧我非慧理戲題五字詩平淡出奇偉若應意挑戰  
詎敢摩其壘大勝賦子虛誇詞託亡是

余將北游留海昏而餘祐禪者自靖安馳來覓

詩

莫煙重山翠微風壯松悲吾為五頂游稅駕脩水湄阿  
餘幽國來細路盤顛危裹飯夜兼程杖笠寒相追入門  
一調笑如獲璧與珪問來何所欲雅意在詩詞念余綠



髮日不減子輩癡是中有何好迷著不自知敗煤磨破  
硯凍筆時呵之詩成思掀豁熟讀忘倦疲乃知少年病  
根蒂老未移雙林古禪宇檀越多孝慈明年東遊還買  
山縛茅茨市蔬近易致紅飯熟夜炊得飽即甘寢萬事  
付兒嬉子輩當從我林麓相追隨十年何足道樂死以  
為期

游薦福題淺沙泉

六月稻田龜兆坼十日愁霖潦翻室試來品下酌此泉



闕寒一泓無減溢以杯浮之著沙石戲投鮒魚露尾脊  
誰令空堦響環珮卧聽冷然心境寂詩成窗戶濕空翠  
便覺西山排闥入

獄中暴寒凍損呻吟

由心有癡愛癡愛乃有業因業疾病生痛此百骨節聲  
相成呻吟齒頰空咬齧側眠看園扉以手枕匣襖觀此  
心無形安得有業結業結如空華病寧有枝葉方作是  
念時顛倒想即滅心造古佛樣路入法界轍稽首甘露



味銷此煩惱熱

御手委廉訪守貳監勘釗慶裕二十三日復收  
入禁將入獄憂無人供飯有銀一兩錢六百  
以付來勝甫勝甫曰此止可辦半月過此如  
何余默計曰有官餉耳

出獄未兩月單身寄孤館別甌容搭餽酬以滌椀盞那  
知復入獄親舊無半眼但餘半月糧何以供歲晏摩挲  
沒柄杓准擬喫官飯來生空歛眉其室亦喟嘆叢林明



白老寰宇洪覺範所至神物護爾輩見不慣我說此偈  
已萬象俱稱贊

與黃六雷三

我覓應傭者忽得黃與雷結束頗精悍拱喏駭吾儕從  
余今幾日臨事見肺懷立身守中直勿自無疑猜為奴  
不欺主乃是廊廟材何必弄筆語然後為賢哉紛紛貴  
與賤百年同一坏弛擔坐亦汝萬事付浮埃

超然攜泉侍者來建康獄慰余甚喜作此



堂堂福德相凜凜龍泉威天神護戒足山鳥曾巢衣彌  
天並輿載清涼七帝師其徒今日榮渠心終笑之一鉢  
游人間不言行四時胡為肯至此驚定心愈疑乃知明  
月淨曾不憎污池異哉月苟星隨逐相因依羣囚手加  
額雀息瞻梵儀吾亦失沉疴一笑歡解頤

次韻雲居詮上人有感

招謁坐多談近稍導寡語仰嗟濁惡世友道終愧古君  
獨淡無營誦經如穀布見人作白眼此意吾亦與十年



雲水間所至每同處舊游雖陳迹歷歷尚可數更期秋  
風高結伴湘山去我生無寸長百事仍莽鹵不知獨何  
修得與君輩伍無乃造物者不殺念癡魯雲居無所為  
粥飯聽鐘鼓不材獲飽暖此德荷佛祖詩成自誇笑聞  
者亦驚顧已決寡語隄事過乃知誤畢卓卧甕邊謝琨  
挑隣女見之獨傲然真情人不怒君能識此意吾語亦  
可恕

大圓庵主以九祖畫像遺作此謝之



大圓庵中亦何有但有草座枯藤枝朝來壁間亦圖畫  
何從貌此寧馨兒髮光抹漆膚琢玉坐睡俛然方拄頤  
當時兩脚不肯舉今雖有口如當時知誰逸想寓此意  
必也高人非畫師我遭俗瞋坐多語坐客厭處終不疑  
興來曳杖出門去路窮回反無澗谿見之心忤有愧色  
君以贈我聊鍼之亦知褊心當服韋命車何必先鋒為  
從今靖然痛堅捍正恐習氣時決隄細看忽憶孔北海  
曾讀曹瞞禁酒詞



送凝上人

我生風韻無塵埃揚清激濁心不回少年不忍混白黑  
出言動輒為身災突汀出岸水必拍喬木穎林風必摧  
乃知此世要不免毀譽於吾何有哉君今欲脫此等憂  
獻君一策真良謀人言白璧為石頭唯唯慎莫分劣優  
坐中亦復發一語衆將環視如仇讐此策簡截君牢收  
飽食熟睡且隨流泛然四海無不可人將愛與君同游

謝李商老伯仲見過



破屋如馬廐楚囚亦王尼名士連壁來下馬氣吐霓論  
高玉屑鋸意妙雞駭犀君看八尺姿一尾抹萬蹄弟昆  
清淨妍俱當籍金閨胡為披白帟作隊趨塵泥漏風駝  
止卧跨海鵲方樓何時對陛下道與稷卨齊功成歸脩  
水春風雨一犁嗟余世不要所至值澗溪願從諸郎游  
日涉長灌畦

別潛庵源禪師

寶公禁鎖尋常事形如聚墨非實然潛庵去眼十五白



再見敬仰加拳拳黃龍今代南陽老而公不減真耽源  
眉須俱荒氣深穩幻滅都盡光渾圓公登八十我纔半  
道義乃爾相忘年西山無時渡漳水洞壑儼在眉目前  
祝公勿學亮座主興來徑往呼不旋

宿宣妙寺

衝虎困頓歸投枕眠爛熳夜晴霜月苦睡美不知旦日  
高披曉綠萬事付衰懶百年炊黍久強半得憂患起臨  
清淺流白髮不可揀此生終一壑形勝已入眼明年定



來歸茅屋並崖瞰掩門無營為一味工寢飯

次韻

我昔度瘴海夜浪光熒熒經旬困掀簸飲食借旦動  
輒值牆壁更覺歸心懶平生百念灰但有身為患卧看  
生與死兩者無可揀那知故園山秀色長在眼愛此  
冽崖中有山房瞰會當持老齒嚼此無沙飯

三月喜超然至次前韻

楊柳風蕭蕭芙蓉渠晴漫漫水閣試新涼披衣快清旦幽



居非養高一榻聊醫懶嘿觀四大空吾復有何患上人  
超詣姿叢林得精揀勿嫌白兆村真是人天眼穿雲得  
得來其他空非瞰遂為信宿留與子同朝飯

謝忠子出山

道人棄家年最少毛骨稽山冰雪妙為余遠出仙廬峯  
雲晴水寒秋自曉孤風峭世鳳增擊高誼映人珠自照  
嗟余苦遭夢幻纏龜囚蠶縛何時了明朝定向舊廬歸  
想見盤空雲露小當期半夜立西風月中拾取吹來嘯



示忠上人

啞羊苾芻紛作隊口吻遲鈍懶酬對猛公來自知足天  
南山爽氣增十倍為公放意談海山神顏透出形骸外  
八月中秋滋露華千畝尺璧生光彩正當刻志從爐峰  
看子穩騎元氣背

懷忠子

昏花委篝燈夜雨集梧井空房嚙飢鼠壞壁咽寒蚓有  
生獨多艱念極淚殷枕親朋勢宜絕醜惡諱聞聽棄遺



等苦李零落如斷梗忠也新數面義已到刎頸願留廣  
推擠守護輕軀命逐臭寧有理嗜茹亦天性人情骨肉  
離道義燕秦并相逢百憂中如熱啜甘冷氣清秋潑山  
韻勝月夕鏡何時一邱壑攜子脫塵境楓林作清歡追  
步千峰頂

次韻彭子長劉園見花

我昔海山度寒食雖有花看非故園今年寒食花又見  
已在故園疑夢魂虛弦喪氣念前痛瘡面敢辭增唾痕



此生流落坐曠達晚悔坦率加辛勤覺城老子天乞我  
人品秀拔高摩雲定應分身在絳闕想見珮瑤裙褶纁  
君看翰墨吐秀句綠楊春重含朝暎袖中功名未暇探  
且復行樂追幽欣陋邦忽見洛陽面為誰扶頭清露翻  
殘春風日太醇醲發粧初罷爭迎門豐肌忍調獺髓醫  
笑渦尚初紅朝溫謫仙點筆風雨疾少陵眼寒煙霧昏  
公獨寓之一戲耳寧用解語方佐尊夜深秉燭花不睡  
飲到落月窺金盆情鍾耳熱意一折賦詩遶紙風雷奔



詩成我讀輒起舞自忘首禿衣絀裨冷然馭風欲仙去  
引手便覺天可捫歸來僵卧數屋角萬象困頓天不言

石門中秋同超然鑒忠清三子翫月

三年竄南荒兩過中秋夕月不棄羈囚高義照罅隙凜  
如寢雪霜但覺炎瘴失夢清不敢歸鯨浪濺天白中原  
一轉首心折數弟嫉遙知亦念我看至玉輪側有生窮  
至此甘作死生隔今年又中秋氣味如夙昔筠溪遶茅  
蘆波影登几席危磴通石門高眺屢顧陟空山夜氣升



草木正蒼鬱超然凜清癯可即不可及華紛落無餘但  
見霜露實三子新間舊學問川增益駿氣不受羈奔颿  
初伏攄人生一大夢聚散兩戲劇境豈妍鄙哉而心自  
南北忽驚西樓高舍光下注射林葉動流水楯瓦粲佳  
色翩然步脩徑杖履草露濕地坐閒無人但聞蟲唧唧  
清境難抱石秀句為收拾明年當復和勝踐要綴續晴  
陰萬里同世路致欣戚付與市朝人舉酒相歎息月雖  
默不言涇渭視喧寂



見蔡儒效

一昨海外歸盡見故山侶夫子獨未見夢想識風度今  
日復何日乃獲抵掌語猶疑是夢中驚定無所覩欣然  
誦新句句法雜今古初如涉微波沙石俯可數忽驚鋒  
刃攢凜然為毛豎可讀不可識森嚴開武庫百態出俄  
頃春破賴綴補詞高殆天得那借江山助人間有此客  
而使衣漉土君看絳闕姿矯不受控御大言卷上商坐  
此得齟齬天公聊戲之一官良蹇寓天風吹綠鬢醉眼



蓋寰宇閭浮一漚耳是身等唾霧功名付揶揄富貴我  
劇具道山弱水上凝睇隔煙雨夜晴覺天多月好笑起  
舞引手挽醉袂忍騎紫雲去

余自太原還匡山道中逢澤上人與至海昏山  
店有作

凶衰不祥憂患變卧念余生真自厭向時衣袂識天香  
竭來唾痕餘瘡面故人訶譏豈忍聞新交推擠不容喘  
子獨心翔異衆人追逐南來不辭遠重逢難取夢中物



一懽且喜身俱健，忽憶南荒海外時。  
敢料北山松下見，鶯唇清滑柳困頓。  
醉人春色初醇醖，莫涼香霧滿村落。  
軒包到榻眠，小店我已歸休。  
萬事足，但餘老眼遮黃卷。  
靜時頗紹痛誠，我先須從此焚破硯。  
念子懷親渡大江，枝葉行復登淮甸。  
分攜一語有精神，行藏直使珪無玷。  
十六夜示超然

山深久不晴，領略三伏暑。  
夜涼聞風泉，疑作空堦雨。  
但覺紙窗明，不知山月吐。  
堦除偶獨立，滿庭浩風露。  
室閒



門未掩時有飛螢度餘生願俱予萬壑千巖處艱難百  
憂中長恐此心負今宵復對榻樂事遽如許地偏心亦  
遠喜俗憂自去風光如輞川窈窕辛夷塢以短暴弟長  
正坐功名悞何如廬山陰一水斷世路持遠兩鏡臨於  
中可無覩此詩若散緩熟讀有奇趣便覺陶淵明彷彿  
見眉宇

瑜上人自靈石來求鳴玉軒詩會予斷作語復  
決隄作一首



道人去我久書問且不數聞余竄南荒驚悸日枯削安  
知跨大海往返如入郭譬如人弄潮覆却甚自若旁多  
聚觀者縮項膽為落僻居少過從閒庭墮鬪雀手倦失  
輕紉扣門誰剝啄開闕忽見之但覺瘦矍鑠立談慰良  
苦兀坐敘契闊誰持稻田衣包此剪翎鶴遠來殊可念  
此意重山嶽悃悃見無華語論出稜角為余三日留頗  
覺解寂寞忽然欲歸去破械不容捉想見厯千峯細路  
如遺索相尋固自佳亡詩亦不惡而余病多語方以默



為藥寄聲靈石山詩當替余作便覺鳴玉軒跳波驚夜壑

余所居寺前有南澗澗下淺池每至其上未嘗  
不誦柳子厚南澗詩又恨東坡不和乃和示  
超然

駁雲漏微日諸峰猿曉時飛檐寄木杪晴瓦暗差差意  
行愛倉涼地坐休頓疲哀蟬尚泣露積水欲生漪瘴癘  
餘睡色破滅老垂垂心事世途悞風神邱壑宜高標誰



對我白鳥深自知重來應避后歸去不須期

追和帛道猷一首

有序

山陰帛道猷詩寄道一有相招之意曰連峯數千  
里脩竹帶平津雲過遠山翳風來梗荒榛茅茨隱  
不見鷄鳴知有人閑步踐其徑處處見遺薪始知  
百世下亦有上皇民政和六年正月十日余已定  
居九峯而起然輩皆在已無所羨持味猷詩追繼  
其韻使諸子和之



永懷山陰老漱流味餘津幽尋見蘭叢蒼然出荆榛便  
欲即之語忘其千歲人歸休正吾志理順如析薪夜春  
博飯喫猶勝海南民

次韻公弱寄胡強仲

念昔謫海南路塵吹瘴風未即棄溝壑尚在桎索中親  
朋半天下萬里不一逢髯胡豈有罪乃肯與我同情親  
等昆弟使令惟西東時為解我語道大自不容邵陽雨  
中別涕淚落無從我伴有形影渠歸無僕僮三年鍛百



巧遂成瘖與聾今日復何日獄寺聞樓鐘聚觀迎萬指  
登睫排千峯黃泉天復見白骨肉已重髯雖未對面音  
問已喜通夫子佐岫嶺有道如葛洪筆力扛九鼎奇語  
出遽忽長篇春爭麗送我歸新豐且約老南嶽幅巾追  
瘦筇拊手輒大笑此計隨虛空山林當付我君事侯與  
公麒麟未易系健鶻那可籠

重陽後同鄒天錫登滕王閣

閑中過却重陽節江城風雨吹黃葉與君來游亦偶然



聚立西偏讀豐碣凭欄眼界得天多  
雨脚明邊飛鳥滅  
西山向人亦傾倒  
犯雲爭來獻層壘  
未歸負負無可言  
相視心知慚在頰  
會當却立雲生處  
縱望晴江生雉堞  
尚喜清游不屬人  
故作此詩相暖熱

次韻天錫提舉

攜僧登芙蓉想見綠雲徑  
天風吹笑語響落千巖靜  
戲為有聲畫畫此笑時興  
夙習嗟未除為君起深定  
蜜漬白芽薑辣在那改性  
南歸亦何有自負蘆團柄  
舊居懸



水旁石室如仄磬行當洗過惡佛祖重皈命念君別時  
語皎月破昏暝蠅頭錄君詩有懷時一詠

次韻吳提句重九

朝來多爽氣拄笏望西山看君此標致合在臺閣間賴  
有宗之輩文字相往還遙知醉九日紅潮生玉顏嗟予  
抱瘴疴古寺長閉關亦復把霜藥行嗅賞餘閑琢詩償  
清境索句常苦艱愛君吐雲詞端為破天慳氣勝起疲  
墮語妙鐫老頑正當作小字明窗寫爛斑



勸學次徐師川韻

揭陽濱瘴海苦霧搏蠻煙自古無衣冠安得禮義傳韓  
子見而歎豈是終棄捐選士得趙德講學與周旋遂為  
鄉里榮士慕舊而先却後三十載才者森排肩東甌贅  
華夏西漢為邊沿民俗號殷富亦有佳林泉黠者事商  
販朴者工力田自隋迄于唐稍知慕華軒乃有歐陽生  
粹然而出焉古文有師法學問知淵源其後賢者至雜  
選盛中原至今號多士富貴爭熏天江南佳麗地南昌



富山川幽谷抱歐峯西山秀氣連地靈祕奇運當有命  
世賢山輝玉韜石水媚珠懷淵君看烏衣裏俊雅爭清  
妍治朝開三舍精揀無遺篇幸當勤燈火無忘臨簡編  
會看起白屋寧遭犯青錢大當到三事小當步八磚趙  
德歐陽生豈獨令居前努力各自勵請視徐子言窮耕  
有惡歲情農無豐年言小可喻大歲晏宜勉旃

送文中北還

瘴海夜成焰鬼闕晝常陰柵廬餘百家間見椰子林居



人例推髻豹狼而衣襟語言不可讀冥目以意尋居然  
不可解欲問返如瘡君持使者節風彩動雲岑軒渠笑  
時語萬籟轉笙琴余方卧園土足然欣足音相逢春脫  
手歸意不可擒便覺暮雨山掃空煙翠深袍袴洗羊負  
項背逃芒針乃爾徑去亟翩翩出籠禽津渡已撾鼓高  
帆摩天心行矣勿作惡萬事付醉吟當會西林下相對  
說如今

次韻彭子長僉判二首



我窮親舊絕君來殆天遣度關一句妙不撥機自轉令

人意頽然盡如醉黎衍

黎人謂飲酒為衍也

新詩麗吳姬霧鬢風

前卷細看發豪放川犇驚地喘才高那可妬默念耳自

反不禁數餘年三眠蠶欲繭思君誰與同月度微雲淺

愁如羊公鶴毳費推遣心如旋磨驢日夜團圞轉夫

子為譏訶譬說頗蔓衍愁心得少休忽作象鼻卷出門

無所詣地坐息疲喘路窮輒一笑興盡復回反風光聞

布穀人家初煮繭倚藤望九峯層疊分濃淺



重會大方禪師

霜顱玉骨眉有稜孤風照人虔敬增寒松撼空夜瑟瑟  
古井吞秋波不興天柱峯前額加手一別十年彈指久  
嗟予塵土化征衣愛君坐中舟壑走繩床為拂兩頭塵  
響答空巖笑語新人間何從得此客解令寒谷夜生春  
大方寺送祖超然見道林方等禪師

道林一身渾是德別來遙知頷髭白尚記山房夜語時  
睡笑訶譏盡秋色黃龍開二甘露門靈源方等真弟昆




道林真珠撒羅帳  
昭默霧豹方埋文  
鷺王自應能擇乳  
飛黃領得王良馭  
東風吹散嶽山雲  
道人明日當歸去  
故人若問老垂垂  
為言肘骨露麻衣  
赤頭已作齊眉雪  
自提風帽海山歸

義牯

快山山淺亦有虎  
時時安尾過行路  
一豎地坐牧兩牯  
以筆捶地不知顧  
虎搏豎如鷹搦兔  
兩牯來奔虎棄去  
回往荷庠挨老樹  
牯相喘視同守護  
虎竟不能得此豎



豎雖不救拈無負一村囂傳共鳴鼓而虎已逃不知處  
嗟乎異哉兩大武高義可與貫高伍今走仁義名好古  
臨事真情乃愧汝此事可信文公語為君落筆敏風雨





石門文字禪卷四



欽定四庫全書

集部

石門文字禪卷五

詳校官庶吉士

臣汪彥博

侍讀臣孫球覆勘

覆校官庶吉士

臣毛鳳儀

校對官主簿

臣郭祚熾

謄錄舉人

臣潘炯

謄錄監生

臣楊其梓



欽定四庫全書

石門文字禪卷五

宋 釋覺範 撰

古詩

謁嵩禪師塔

吾道例

一作比

孔子譬如掌與拳展握固有異要之手則

然晚世苦凌夷講習失淵源若看投跡者紛紛等狂顛

韓子亦儒衣倔強稱時賢憑凌作詬語到死不少竣後

世師韓輩穴攘

一作長

猶可憐走

一作趨

名不自信逐隊工



語言譁然皇祐間

初一作

飛蚊鬧喧闐田衣動成羣怒癭

空自懸縮頭不敢息兀坐如蹲猿堂堂東山公才大德  
亦全齒牙生風雷筆陣森戈鋌隱然湖海上長庚橫曉  
天作書肆豪猛揮斤莫敢前羣兒雖貌敬臆論已不專  
書成謁天子一日萬口傳坐令天下士欲見嗟無緣功  
成還山中笑語答雲煙我來不及見山水自明鮮入門  
寂無聲脩竹空滿軒永懷脩然姿骨月聳清堅僮奴豈  
知此住此亦彌年指余以石塔草棘北風顛再拜不忍



去聽此遶澗泉吁嗟末運中那復斯人焉文章亦細事  
清苦非所便但愛公所守遠相諸祖肩遲遲哦公詩落  
日滿晴川願攜折脚鐺結茅西澗邊歲時遷松竹來此  
掃頽磚

補東坡遺三首題武王非聖人論後

青燈照華髮掩卷成嗟咨事有世共見而意復難知殺  
父子受封殆非人所為孟津觀兵者非天尚誰欺孔子  
蓋周人而為殷宗枝欲辨則不敢亟口稱夷齊使彼果



聖乎古今無異詞則其罪武王明甚無可疑叟叟與世  
辨泛濫驚羣兒惜不經柳子為一剖擊之知誰千載下  
擊節讀吾詩

食菜羹示何道士

窮冬海道絕瘴雨晴墟里何以知歲豐未久炊煙起先  
生清夢回科髻方隱几獠奴拾墮薪發爨羹諸米飽霜  
開葉松近水繁花薺都盧深注湯米爛菜自美椎門醉  
道士一笑欲染指誠勿加酸醎云恐壞至味分嘗果超



絕玉糝那可比鮮肥增惡欲腥膻耗道氣畢生啜此羹  
自可老儋耳錄以寄徐聞阿同應笑喜

己卯歲除夜大醉

昔聞安期生以術干項羽羽無人君量佯狂輒遁去又  
聞魯仲連舌有濟世具人君欲祿之高視笑不語吁古  
列僊人萬事不干慮乃肯入世紛豈非以民故翩翩遙  
增擊悠然知事悞道合人所難一律無今古我生飽憂  
患晚有二子慕骯髒刺世眼甚宜著閑處一篇引一杯



舉杯揖黎母

次韻李太白

我讀謫仙詩句卒意不盡層峰俯絕壑可望不可進忽  
如登旋雲便覺星斗近濁醪世間義糟粕真典墳先生  
瓊液口不飲嫌其村只今牛渚春盎盎餘醉覓昔醉過  
汗漫懷袖揣崑崙爾來顏檐下負日虱自捫

次韻蘇東坡

先生謫儋耳一葉航渺茫褊心隘世議怒罵成文章昆



蟲伏孔垤仰看青鸞翔世欲羈縻之凡慮不自量瓊山  
遶珠淵寶光夜煌煌我曾至其舍月出波心房追惟對  
遺編燈火夜初涼麗詞有逸韻文君方小粧便覺胸次  
間八窗玲瓏光似聞青冥上幢節鳴珮璫先生應過我  
衣袖識天香

餽歲次東坡韻寄思禹兄

我來客湘江獨泛無人佐封疆接南越都會列百貨方  
嗟歲除矣仍喜此月大思歸姑置之且枕曲肱卧餽問



亦未能起看燈照座念貧米無舂笑富粉轉磨二者分  
劣優等是一年過唯有東坡翁作詩今續和

守歲

除夕自不寐守歲世事蛇念此歲月往嗟哉難蔽遮舊  
歲幸無疾新歲知如何此夕且相守拊掌一笑譁靜聞  
鬧市中夜鼓不停撾弟兄醉酩酊冠巾墮歌斜我居巖  
壑中不覺日蹉跎和詩無好句其敢對人誇

別歲



新歲壓已至舊歲去不遲我尚留不住石火那能追不  
知歲所在鳬雛喧水涯父老相邀迓年年知此時梅花  
只落盡又見春水肥我本無欣喜何嘗有戚悲想見君  
飲酣一舉時一辭春容尚能老此身那不衰

仙廬同巽中阿祐忠禪山行

好山不知源勝處藏疊嶂興來理清游意適爭勇往事  
異傾同識顧語山答響野泉行淺沙脫屣屢植杖相羊  
木陰下喘坐清相向阿祐華林風媚秀得妍狀忠禪等



鵠清精神照冰段住山異比丘韻出羲皇上風度太清  
癭吐語極豪放撥置形骸外卸械藉草莽獨余衰退姿  
面色餘煙瘴勝踐偶獲陪茲樂非夙望一笑粲妍鄙散  
坐推少長媿無斜川詩苦語出牽強讀之輒自嗟幸君  
一拊掌

送稀上人還石門

海昏石門在深谷排闥千峰如觸鹿巖然獨秀一峰高  
自與千山作眉目曾學關西一味禪衆中雜還多豪賢



如今此老成新塔但有樓閣如當年道人今作石門客  
須眉尚帶芳鮮色冷齋說我舊遊處夢魂夜渡脩江碧  
朝來秋聲發舟樹羨君先我山中去故人問我歸何時  
試令哦我送行詩

寄題彭思禹水明樓

議郎詩眼發天藏吐嗟辨樓臨汝水遙知殘夜笙歌散  
月出東南人獨倚纖雲滅盡光下徹微波不興天著底  
忽驚白晝在軒窗試數游魚見鱗尾平生骭髀笑伊優



官冷對人言少味但余清境得厭飲天應用此相償耳  
我當興發竟相覓一拐西風健行李登臨尚能為君賦  
要使江山增勝氣

復次蔡元中韻

江樓為誰構想見晴瓦碧夜讀樓中詩終疑筆五色氣  
方吞劉備和不以口擊麗如傲梁公正恐是花魄君才  
比西子果識天下白我句陋無鹽筆硯焚欲與吾家大  
馮君酒酣頗自適書來誇壯觀盈紙濺醉墨初無萬錢



念脫帽見禿筆時時及少年追逐寄夙昔誠勿效寶公  
清狂挑鏡尺

次韻思禹思晦見寄二首

新詩夜讀寒更盡兄弟盡容窺所蘊此詩未暇數奇趣  
談笑先看押難韻家在筠溪白石灘後堂分得玉千竿  
遙知華屋青燈夜想見對牀風雨寒湘山曉學愁眉淺  
思歸凭高意凝遠貫珠妙語肯寄我暴富人驚呼北阮  
何時促詔紫宸對草制千言倚馬待才高合在明光宮



忍令流落江湖外我漁意不在金鱗湘浦華亭一樣春  
苑頭佐舟未乾沒問法僧來寂寞濱古師政與人意合  
有問自應忘所答一波纔動衆波隨光徧千燈無壞雜  
多生垢習消磨盡一念定光空五蘊尚能弄筆戲題詩  
如鐘殷牀有餘韻南臺煙靄隔重灘城廓遙應認剎竿  
湘西六月失三伏一枕窗風午簟寒年來懶復嫌山淺  
更欲移庵藏僻遠又思喧寂不相妨卧念當年三語阮  
鏡裏朱顏豈長對歲月去人寧少待是身已作夢幻觀



肯復經營此身外議郎材志堪逆鱗笑談解生寒谷春  
會看為天作喉舌願聽高風淮海濱要知未必與世合  
載之詣世世不答譬如瓶中有澠溜雖與世混終不雜

戲廓然

久不對睿語便覺牙頰強獨行谿山間清鵠失羣伴溫  
軟聞吳音攀翻忽東向試問識睿否客曰甚無恙但遭  
呂吳興拽手不少放欲使開笑齒說法人天上掉頭掣  
肘去不顧西興浪登舟翻然行萬衆皆目斷平生勇於



道氣韻真邁往安肯逐兒輩低首投世網但恐呂望之  
追法薛廷望茶鹽以加之趣出白雲嶂要看呵佛祖瘦  
拳捉藜杖

清臣先臣過余於龍安山出羣公詩為示依天  
覺韻

隨軒文字海異寶羅周遭忽見張公詩雪浪翻驚濤坐  
令千巖秋萬壑風怒號如君閱縉紳異材雜蓬蒿我公  
廊廟姿王室久勤勞只今天下望北斗太山高驗君平



生術月脇窺秋毫嗟余人世外靈臺闕鑰牢行將侶白  
鷗浩歌作遠逃已作華亭叟月明水一篙

器之喜談禪縱橫迅辯嘗推衲子叢林苦之有

詩見贈次其韻

彭侯慣法戰機鋒吸西江衲子畏面目望見投矛鏃叢  
林真一害斯人喧此邦我雖耐矢石貌抗心已降霜鐘  
但摩挲豈敢施微撞時來奮棘髯劇談對閑窗初見搖  
心樹久則推慢幢遂使澆薄態琢磨成敦龐吾志荷大



法君欲插手扛從來內外護劉遠名亦雙斯道久破碎  
百孔而千瘡要當共補綴追配能與龐

春去歌

杏子生仁桃葉長西園日脚踰女牆牆陰嬌語誰家娘  
涼涼作隊來採桑玉纖拾礫抵翠羽鶯燕笑語殊不忙  
吳蠶睡起未成繭肺腸已作金絲光歸來遠山堆暮碧  
無端野李嬌春色辛夷花零愁更多熏骨真香無處覓

贈雲道



道人有奇骨野鶴在雞羣十年江北南高蹤等浮雲鶴  
來闕國生紛埃浣衣裙西山遶漳水玉澗連石門中有  
唐朝寺禪誦度朝昏正當袖手去坐對栢子焚君看市  
朝間凍螳環磨輪何當作高笑視世一虻蚊

贈少府

每欲一醉竟未嘗今朝杯翠如桄榔須臾耳熱仰天笑  
氣吞萬里駒方驤何從人間有此客杜門忽見車軒昂  
興來對我弄絃索妙觀隨指追文王絕學子雲不汲汲



頗許叔度能汪汪何當萬事付一笑卧看天雨雲飛翔  
次韻明應仲宗傳送供

老住江上村隨分亦迎送陪堂一鉢飯不得日日供唯  
無清淨福正坐失脩種後身老湘龐測然施心動妙語  
俱積香把玩廢吟諷才高氣駿特飛兔不受控關與洗  
妬慳何止愈頭痛吾聞佛事門同宗而異用甘贄打粥  
鍋應仲獨送供

七月十三示阿慈



寺已餘十僧田不登百數何以常乏食強半了租賦今年失布種正坐無牛具六月始分秧江流冒塍路水退秧陷泥經月已無雨枯根拆龜兆瘦葉壓勃土隣家飯早占我方質袍袴此生為口腹夢幻相煎煮阿慈佐井田事衆耐辛苦今朝質且盡父子屹相覩頽然輒坐睡欠伸久不語只箇甘露滅可質請持去

予頃還自海外夏均父以襄陽別業見要使居之後六年均父謫祁陽酒官余自長沙往謝



之夜語感而作

一昨游京華壞絨變塵土思歸念雲山夜夢亦成趣故  
人驟登庸時時宿西府如鳥得所棲倦適忘飛去從中  
奇禍作失聲驚破釜三年王海南放意吐佳句歸來駭  
叢林冠巾呵佛祖突兀刺世眼所至遭背數夫子獨凜  
然高誼照寰宇哀憐欲收拾奮髯排衆怒豈惟子義世  
獨有孔文舉此恩無陳鮮歲月有今古竭來湘楚遊坐  
閱六寒暑今年中秋夕水宿青蘋渚誰持一紙書剝啄



叩蓬戶呼燈得款識失牀喜而舞開書有新詩喜事遽  
如許麗如春湖曉月映薔薇露筆力回春工彷彿失風  
度湘江三百里款段沿江路嶽色滿征鞍疾驅那敢顧  
朝來真見之了非夢時遇堂堂千人英要是幹國具龍  
蛇吁莫測岑蹄聊塞寓道固有晦顯會看跨雲雨天下  
張荊州四海陳合浦當時寂寞濱皆獲陪杖屨今又從  
公游楚山更佳處詩成倚嵒臺天風吹笑語

次韻陳倅二首



夢幻有貴賤譬如綿與蘆美惡俱一暖未易相賢愚我  
少懷毛髮倦禪輒逃儒投老加冠巾舞笏師道吾世事  
幾時畢雲山何處無何為聚落中滯留如賈胡溪聲替  
說法聚石為講徒拍手笑遠志甘為小草乎霜清已高  
揭水清見游魚橘洲頽晚照屬玉行烟如我窮世不要  
老並湘江居君獨念故舊時時容借書我亦循陳迹驅  
莽如磨驢詩成輒自省壁月掛清虛

余游侯伯壽思儒之間久矣而未識季長昨日



見之夜歸作此寄之

公家兄弟俱秀傑人言不減河東薛鳳皇鶯鶯雖見之  
聞有鵝雛更超絕周郎坐中見新作天葩奇芬衆口愕  
君看氣焰遮縉紳想見精神映臺閣我窮歲晚猶奔走  
小邑那知有避后堂堂合置明光宮簿書堆中不宜有  
功名偶然耳是寄故應隨流坎而止且置袖中批誥手  
下簾絃歌聊爾耳此詩摹寫見標格晴湖無風照春色  
滄海遺珠果見之邵陽他日如彭澤



李長見和甚工復韻答之

翰墨場中見奇傑行書半雜歐與薛此詩押韻如射鵰  
應弦而落人驚絕詞惟達意非有作公雖不怪傷人愕  
嗟余平生事苦吟吟筆今真為公閣渙然成文自湍走  
如水與風初邂逅頗然綠髮映華裾人間此客何從有  
我誦此生真一寄禪林枝穩容棲止敢將醜惡酬絕倡  
狗尾續貂堪笑耳坡谷淵源有風格光芒萬丈餘五色  
吾聞龍蛇所由生必也深山并大澤



李長賞梅使侍兒歌作詩因次韻

年來搞項皤須髮世眼憎嫌遭棧絕君獨照人如冰輪  
洗盡宿雲寒皎潔今日層樓空獨倚天高袞袞飛鴻滅  
掉頭哦此賞梅詩如對北窗香噴雪愛君語妙蛻塵埃  
道骨自能逃歲月玉兒豈是解清唱想見笑中呵手折  
嗅看應作小顰嬌關心不與年時別一懽紛然雲雨散  
落英滿地蛙聲歇可憐城郭都不知新詩一出人爭說  
和羹他日願如君長紅裊花歌壽闋



次韻見贈

樓鐘尚殷牀密室僧定後窗風鳴撼撼黃落知榆柳蛛  
蛛忽胎絲燈花亦駢秀人從城郭歸村落聞夜唳讀詩  
映檐月兩清俱頓有斯人太白豪醉裏詩千首要宜萬  
丁帶肘合黃金斗袖藏批誥手却作僧扉扣玉堂未放  
君此物君家舊飽永仍父職人望亦天授懸知夜直清  
應念山中友莫以腕脫後嘲我飯山瘦

季長出示子蒼詩次其韻蓋子蒼見衡嶽圖而



作也

曉烟幻出千萬峯個中我曾如懶融天公亦妬飽清境  
戲推墮我塵網中人生萬闕無不有道士寧知為老楓  
去年雪夜宿絕頂笑聲響落千巖風今年千巖在掌握  
烟雨又復分西東磨錢作鏡照千里必也高人非畫工  
李長胷中自邱壑吐辭便覺春無功韓侯玩世難共語  
精神滿腹仍踈通酒闌耳熱眩紅碧醉語撼子崔嵬胸  
遙知墮幘笑不答但見玉頰回渦紅



子偉約見過已而飲於城東但以詩來次韻

一杯愁倡低眉峰不平萬事都消融嗟余分身處處有  
遙知到子談笑中平生蹤蹟亦可笑以醜見傳如癭楓  
而公才大置閑地正坐道骨合仙風頗聞少年類豪俠  
臂鷹走馬王城東爾來閉門看脩竹藉甚但傳詩句工  
懶於能琴嵇叔夜癡於戀酒王無功明朝此樂墮渺莽  
路隔關河魂夢通付子後堂以清夜料理絲竹園酥胃  
曲音少悞即回顧笑着杯面微波紅



李長出權生所畫嶽麓雪晴圖

湘西今日雲生早嶽麓雪晴看愈好朱欄青瑣寄木杪  
下臨絕壑青松道知誰沙步泊漁舟舟中應容寂音老  
愛山誰復如君者一幅湘西和我畫分身亦欲看京華  
要使癡兒驚羽化

李長盡室來長沙留一月乃還邵陽作是詩送  
之

邵陽歸去知幾里萬頃斜陽渡湘水一葉扁舟共看山



伯鸞德耀俱風味  
山中信宿不忍去  
班草松間呼不起  
波心月出卧不知  
但愛松風吹醉耳  
朝來拾得浩蕩春  
雪英紅雨紛桃李  
大鐘橫撞山答響  
遙知有寺藏層翠  
想見道人出迎客  
犀顱戢戢三千指  
王事得從方外樂  
佳處遲留固其理  
何當更和宿山詩  
要看雲泉生逸氣

送季長之上都

十年不踏黃塵路  
老盡歸心餘一縷  
因同夜語想京華  
歸心百尺游絲舉  
前年別我楚山邊  
解鞍班草弄雲泉



今年送公古城北花發水流聞杜鵑眉間秀色照春晚  
青雲故人紛滿眼前車馬氣如雲知誰倒屣迎王粲  
行看腕脫供十吏玉堂風景非人世萬乘扣扉宮月斜  
夢驚呼燭度窗紗

西湖寺逢子偉

我行厭風埃日莫休逆旅疲坐捫蚤蟲呼童洗袍袴起  
尋古招提思與幽人晤忽覺華氣生乃與周郎遇笑談  
傾坐人我亦為停麈袖中出新詩貫珠穿妙語麗如花



林風清甚空階雨坐令羈旅情掣肘棄余去太平疆場  
空英雄功業悞如君文武姿其可著閑處霸陵舊將軍  
月黑射猛虎夜歸逢醉尉頗復較勝負丈夫有用舍世  
態度今古何時紫泥書夜半捶門戶邊風吹塞塵千騎  
紅粧女橫槊賦新詩唾手取黠虜麒麟入圖畫佩劒撚  
白羽

和曾逢原試茶連韻

霜須瘴面豁齒牙門前小舟嘗自拏茅茨叢竹依隴畬



君來游時方採茶傳呼部曲江路賒迎門顛倒披袈裟  
仙風照人虔敬加秀如春露濕蘭芽和如東風吹奇葩  
馬蹄歸路衝飛花青松轉壑登龍蛇路人聚觀不敢譁  
詩筒復肯來山家想見戟門兵衛遮湘江玉展無纖瑕  
但聞江空響釣車嗟予生計唯撓鰕安識醉墨翻側麻  
喜如小兒抱秋瓜宣和官焙囊絳紗見之美如癢初爬  
愛客自試懽無涯身世都忘是長沙院落日長蜂趁衙  
園林雨足鳴池蛙詩成句法規正邪細窺不容銖兩差



逸羣翰墨爭傳誇坡谷非子前身耶沅湘萬古一長嗟  
明年夜直趨東華應有佳句懷煙霞

次韻曾嘉言試茶

不嫌滯留湘水涯時作新詩誇露芽此篇醉墨翻龍蛇  
雷鋹雨雹飛塵沙開卷疾讀喜欲譁此郎真是能世家  
氣如橫槊萬騎遮妙如琢玉無疵瑕縉紳傳觀衆口誇  
矧余禿鬢纏袈裟崔嵬曾次書五車於人豈止一等加  
坐令應手開天葩不因筆端夢生花何時詞刃誅姦邪



世途嗜好紛萬差風流掃地吁可嗟十年去國道路賒  
兩手未忍置所拏賣生豈欲從螾鰕淵明但愛談桑麻  
湘西有舍如藏蛙年來頗種東陵瓜愛君才宜踐清華  
妙年聲譽聞童牙君看愛客自著茶紅粧聚觀爛朝霞  
撐突萬卷遭搜爬職宜蓮燭燒窗紗不宜槐笏趨早衙  
未甘終老勤山畬尚能見子昂霄耶想見霧窗煙縷斜  
次韻許叔溫賦龍學鐵杖歌

君不見楚竹虛心勁如鐵上有娥英灑清血歲寒姿含



懷愴情亂點餘花澹高節又不見南山紫藤亦清雅過  
頭標致宜老者一簪華髮烏角巾瘦拳扶之立松下何  
如我公蓄神物鏗然振之露風骨橫拈倒用驚老禪勁  
如紫藤節如竹個是雲門真正脉不學芭蕉空指月十  
方都在此杖頭視之不見纖毫隔說禪游戲時卓地魔  
外狐禪俱膽碎仙郎聞是旌陽孫文章自宜掌帝制從  
來詩句人爭說時出一篇慰衰蘭此篇秀如望秋山奇  
峯自獻晴雲滅竭來酬唱已厭飫與公傾倒良有素豈



惟但和鐵杖詩追從已辦登山屨

復和答之

君不見功名欲致硯磨鐵桑公人間駒汗血五季干戈  
爭奪中低摧幾不保臣節又不見相如賦工合騷雅九  
重偶有賞音者及見但為上林令斷國反在淄川下長  
笑兩事俱外物自憐不是封侯骨獨愛華亭百衲師小  
艇橫蓑一竿竹久住湘江諳水脉揭蓬慣看湘西月聞  
道公眠畫戟叢相尋長恨城闌隔去年卜居城北地客



心每有悲茹碎慚愧詩筒走老兵病眼那容見新制老  
來情緒那忍說夙瘴乘之覺疲蕭此生夢幻姑置之半  
掩殘經香篆滅湘中清境享已飫湘山多情慰心素年  
來更欲學睦州古寺閉門工織屨

次韻題顓顓軒

睡覺飛蚊繞鬢聲讀書偏愛小窗明梧陰滿地方隱几  
想見搜詩毛骨清誰教風鑒在人間眉宇淵然如魯山  
指點虛無數歸鴈摩挲香滑寫琅玕舊聞五色筆如椽



平生醉裏傲羲軒，登軒不解顚顚意。  
幽鳥自啼華不言，賈生憂鵬入其居。  
子美亦遭半酒污，仙郎兵衛森畫戟。  
風調特與前人殊，杖屨相從年可忘。  
不羞蒹葭玉樹旁，青眼特開浮世少。  
白頭相逢故意長，尚記垂髫秀發時。  
神彩不異崔宗之，此生流落天一角。  
敢料長沙再見期。

贈別不愚首座

道人貂蟬後，骨面遠瞻視。  
少年憎俗子，竟以須髮毀。  
形骸已變盡，終不沒豪氣。  
君看談笑時，時復出奇偉。  
湘西



松下見班草問行李問儂歸何許披須開笑齒名山皆  
吾家況復生如寄意行吾車馳身止吾駕稅吾生天地  
間大倉一稊米只今相會面寧知非寄耳思歸固偶然  
吾詩聊一戲

題王路分容膝軒

詩眼愛雲泉玉骨含富貴精神盡牒開怒威亦和氣材  
宜侍至尊廣殿儼劒履胡為簷隙間僅止容膝耳譬如  
橫海鱣蜆屈見脊尾卷而為一髮寓此涔蹄水何當黑



月夕戲逐風霆起懸知王氏軒又補湘中記

次韻游石霜

霜華舊游秋正深澗風落日寒蟬吟  
歛眸默數曾到處笑看碧煙浮水沉  
竭來大旆為山至山綰煙鬟三十二  
當時老宿契新豐坐令衲子如雲萃  
眼前無復見此公歎息叢林掃地空空  
餘樓殿出雲雨塗金澗碧光巖叢  
卧聽松風難比擬箇中偈句誰宗旨  
賴公摹寫入新詩公不作詩山媿恥



次韻登蘇仙絕頂

平生合腰萬丁帶誰使天涯宿溪瀨曉驅部曲上香山  
路人如堵看飛蓋桂環卷舌嘯雲煙右轄風流是謫仙  
輞川草樹入畫圖此風顏落今追還散髮巖阿聊一快  
世議從來嗟迫隘為君戲語敵山光棘句鈎章窮嶮怪  
詩成便覺王公輕整頓道山歸去情子廉未必山林見  
市人中有安期生

次韻謁子美祠堂



心許房次律神交郭元振人品如奇峯橫秋聳孤峻筆  
陣工斫伐忠義見詞刃仕如上瀨船饒力挽不盡酒狂  
誇嚴武登高叫虞舜大愛淮南王甘作天廚擯死猶遭  
謫誣謂坐酒肉饑荒祠叢篠間下瞰湘流浚夫子縛富  
貴高韻洗驕吝詩清如玉珮中節含溫潤並轡揖此老  
讓驅不肯進嗟予固瞠若却立那敢瞬

次韻雪中過武岡

今年湘山三尺雪大松夜倒蒼崖冽曉驚誰推華藏界



墮我生前光不滅  
馳裘右丞郭泥馬  
壯士甲趨花灑鐵  
空齋夜對故人榻  
妙語霏霏如鋸屑  
窗寒霧暗日生東  
恍疑珥筆明光宮  
蹢躅欲點朱藍袂  
一聲雲斧山玲瓏  
明年麥秋歌歲豐  
夜香橫目祠上宮  
太平無象天有道  
塞塵蠻雨長濛濛  
歸來笑卧北窗下  
侍兒簇花開清夜  
老尋清境幾成癖  
一觥滿引酬譏罵  
應思和月踏層冰  
快意暗驚夢猶怕  
詩成字字如貫珠  
乞與人間不知價

次韻連鰲亭



危亭為誰小臨此一泓碧晴天戲投餌戢戢見尾脊而  
以鰲名之相顧愕坐客昔人醉魚海六鰲曾偶得歸來  
眉目間津津有矜色安知華藏界持取等戲劇納之芥  
子中不見有迫窄巨細何足較未出是非域夫子忻然  
笑請以書屋壁

同游雲蓋分題得雲字

分才如天驥超絕氣逸羣低推簿書中一笑置勿論我  
如剪翎鶴俛啄窮朝昏生涯無害子乞食嘗扣門但為



口腹累乖隔如參辰此夕復何夕共宿湘山雲境清藏  
勝氣情高發幽欣天風吹笑語乞與人間聞念公翰墨  
場少年策奇勲世味如嚼蠟喜著磨衲裙裴公師黃蘗  
圓澤友李愷因法偶相逢則以法為親安知我與子夙  
昔非弟昆吾聞三生石曾歌舊精魂他年葛洪陂相尋  
定煩君先當理故事過山尋老仁要同夏口村發難驚  
前身

治中吳傳朋母夫人王逢原之女也傳朋作堂



名養志乞詩為作此

少節暮年名太重詔書致之堅不動當年捧檄良為親  
安知坐中有張奉茅容避雨依樹叢苟人夷踞渠獨恭  
朝來殺雞本供母從教牀下拜林宗兩翁高行今誰繼  
吳侯作堂深措置鏡中勲業姑置之自廣其心養其志  
傳記絕似廣陵公從來孟陶風味同未能侯門煩倒屣  
想見窗戶開青紅夫人年高視聽捷扶持不用如華妾  
十分金葉壽千齡笑看醉紅潮玉頰



石門文字禪卷五



欽定四庫全書

石門文字禪卷六

宋 釋覺範 撰

古詩

寄彭景醇奉議

我庵湘山麓君家湘江尾共看湘山雲同飲湘江水君  
有負郭田飽食騎犂世小兒探井臼大兒了租稅我獨  
生事拙饘粥每不繼君如李大夫時時容乞米永懷湖  
山堂風物自閑美楞嚴初讀罷篆冷空窓几微風拾殘



紅幽鳥妨春睡蒼苔滿門巷榆柳陰覆砌杖策亦窺園  
悠然望層翠歲時無營為祭奠修家禮自覺去幼安正  
復不遠耳遙知讀此詩忻然開笑齒

宿湘陰村野大雪寄湖山居士

夢回聞打窓曉起喜覆瓦江山驚晝永秀色互相借升  
鞍風便旋浩蕩春隨馬不憂江瘴生更喜麥連野湘山  
宜可老慶弔同里社乃爾廢推擠眷此多賢者湖山蒼  
蘆林為我花連夜想見老居士擁衲清入畫山陰興未



盡玉塵思對把政恐觸機鋒怒遭握拳打遙知和此詩  
呵筆意閑暇妙語鬪清妍正圍紅粉寫

景醇見和甚妙時方閱華嚴經復和戲之

夫子和雪詩放意如注瓦手搏華嚴界笑中已見借高  
詞師棗柏寧暇數班馬如登妙高峯如游廣莫野怪公  
個中人亦入此保社朝來誰扣門寂音老尊者扶筇坐  
山堂詩眼不知夜不入人間世誰將作圖畫但欠維摩  
女玉骨無一把紛紛散奇英梨花風雨打湖山晚多態



應接殆未暇此詩聊戲公詩成還自寫

雪霽謁景醇時方禊堤捍水修湖山堂復和前

韻

禊堤蓋南堂雪霽響新瓦我踏雪泥至自攜雙不借愛  
公有俊氣句法洗凡馬清婉繼彭澤寒陋笑東野願爲  
西崦隣投名入詩社餘年吾事濟過從有公者何時聞  
折竹燈火共清夜曉堂人未掃如開輞川畫平生學牧  
牛鼻索嘗自把而今失所在寧復事鞭打吾詩一寄耳



雕琢特未暇且欣兩俱健意氣要傾寫

和景醇從周廷秀乞東坡草蟲

周髯迂闊亦自笑安樂飢寒奈嘲諑東坡墨戲偶得之  
保藏更作千金調自言吾富可埒國癡病已深那可療  
坡初畫此適然耳髯以夸人無乃勦彭侯滿腹是精神  
翰墨行藏兩俱妙應嗟玩物非尚德未欲奪攘投火療  
乞之如易紫香囊豈弟高風珠自照此詩醇醲等佳醕  
爲君滿引那辭醕



題萬富樓

賢爲萬人英筆力挽萬牛寶帶腰萬丁封及萬戶侯彼  
富一二數其實富未周君看清曲江傑立萬富樓山川  
占形勝佳處橫高秋丈人披白恰凭欄清兩眸凜然無  
求姿一洗驕氣浮郿塢癡肉鬻金谷酒色囚名均謂之  
富涇渭實異流余窮蓄一喙得飽事事休貧富若天淵  
飽豈有劣優此詩如橄欖初嚼欲棄投終然成可口味  
永當見收



湘西飛來湖

武林散煙鬟一峯螺髻孤煙雲有奇態華木秋不枯理  
公何許來望見輒軒渠曰此靈鷲峯何年來飛乎個中  
有白猿爲子抵掌呼至今呼猿澗飛波跳碎珠竭來楚  
國南萬山爭走趨精廬開橫塘清可照眉須高人家武  
林致此從東吳那知湘水西乃有飛來湖連蕩滿秋色  
小艇藏菰蒲閑來倚危檻對立鷗烟如我與湘峯色俱  
堪入畫圖



次韻周達道運句二首

問人欲買山便應知官情詩眼艷秋水袖手望空青家  
蓄不貪寶寸田常自耕永懷柴桑歸悠然見真誠不甘  
口腹累折腰求乳腥偶題五字句醉墨半欹傾麒麟入  
圖畫鼎鼎書姓名何如癭瓢中獨酌郎官清烏啼春寂  
寂院靜花冥冥懸知睡足處衾暖紙窓明

朱門連大藩知是故人宅登門一笑懽忘其身是客叢  
林斷岸西聚落一水隔欲知往來數雞犬亦相識人情



改朝夕世議苦迫窄公輩月輪高不浣濁流色撥書臥  
清曉井汲聞餘滴職嚴賓謁少境靜意自適嗟余眷閭  
里邊風馬嘶北公賢義當親此外吾何擇瘴疴蘇晝簾  
小寢喧鼻息夢驚哦公詩清懽洗岑寂

大雪寄許彥周宣教法弟

湘西雪連日荒寒發明鮮誰持華藏界墮我宴坐邊遙  
知毘耶老蒼筍開滿前想見散華女笑頰微渦旋不受  
禪律縛尚遭富貴纏遊戲翰墨中骨清聳詩肩白灰紅



麒麟玉液黃金然醉眼艷秋水落筆驅雲煙放意吐秀  
句與雪爭清妍我詩出寒餓苦語秋蛩煎定作笑拊掌  
望空鬚一掀

臥病次彥周韻

臥便午簾祛殘暑誰令殿閣風鷗語君來談笑破岑寂  
慰此經旬攜手阻湘山解事不須招數峯入座爭翔舞  
心知清境世不要勝踐從來數支許戲將平時說禪口  
貶剝諸方呵佛祖眼高叢林不見人但許南臺稱法乳



忽驚詞鋒亂斫伐披靡千人如項羽詩成相對兩客嗟  
此生俯仰成今古

次韻朝陰二首

輓轡曉汲罷幽響聞餘滴不知雨毛空但覺炊煙濕閑  
居少過從屋角寒藤入夫子獨念我問訊常絡驛時來  
欸柴扃飢飽共休戚此詩麗如春妍暖破岑寂如追薊  
子訓可望不可及

稻田翠浪翻風葉朝露滴按行阡陌間歸來袍袴濕駸



雲漏日脚窻戶空翠入當年走京塵日莫馳山驛此生  
彈指間強半是悲戚竭來效支遁買山老閑寂君真許  
詢輩詩語時見及

余病脾氣李宜中教余服仙茅乃從彥周乞之  
彥周袒肩荷臨濟呵余鈍根敗闕病輒服藥  
是以生死爲二耶得藥作此謝之

嗟余早衰人多病良業疾脾勞禁晚食腿重怯下濕爾  
來又增添冷氣攻脇脊愁坐如蹲援呻吟喧四壁聞世



有仙茅溫中等金石恐能祛吾疾僥倖延餘息我家小  
郎君道眼窺罅隙恐余偷心在指數煩口擊負負無可  
言頽然慚道力檢密念慧遠誦呪憶羅什兩翁例一笑  
顛倒不足惜世尊病須乳侍者遣行乞達磨五遭毒知  
毒乃敢食佛祖豈貪生避就唯恐失二者如不坐吾罪  
亦可釋想見讀此詩笑中和易色

彥周見和復答

既有疾可示非是都無疾如春有陽燄渴鹿想爲濕以



君足疾苦例我痛腰脊忍痛而曰空觸牆爲無壁此論  
蓋四座聞者皆屏息吾聞有漏軀有病資藥石漏盡病  
乃除其神則無隙譬如出鑛金萬鍛受鎚擊妙哉透開  
老辯博見才力種性能文章怒罵成詩什荆山玉抵鵲  
而爲路人惜此詩不辭和而藥不厭乞又如夢中人飢  
而獲飲食覺來輒大笑飢飽兩俱失以是知法空妄盡  
方自釋解空如佛言不許離聲色

彥周以詩見寄次韻



兩詩護宗旨萬仞仰峻嶺攀緣不可及妙語出鋒穎鈍  
根遭譏訶正坐不勇猛譬如策疲羸強以扛九鼎頑冥  
雖難化豈不發深省坐令跛驢心奮迅起馳騁愛君辯  
縱橫又畏面嚴冷直諒有如子敢不加虔調尚記笑語  
時水軒同煮茗池閑如鏡空倒蘸垂楊影歸來渡湘江  
一葉浮萬頃舟中亦曬藥欲以駐顏景君儻終不瞋藥  
盡更當請

送彥周



虞卿脫魏齊拚意與俱去公卿一破甌掉臂不復顧蕭  
何追韓信棄車遂徒走貪賢如攫金不見市人聚會合  
意傾寫掩書想風度彥周雖綠髮風味映前古高論傾  
座人能破萬毀譽獨立傲世波屹然如砥柱令人每見  
之不敢發鄙語推隨吾法中偃蹇揖佛祖死生人所怖  
玩之於掌股此生幾離別此別覺酸楚夜寒衆峯高獨  
看霜月吐明日解歸舟西風白蘋浦君去我獨留蒼茫  
煙水莫



長沙邸舍中承敏覺二上人作記年刻舟之誚

以詩贈

道人天姿心匠妙漆瞳含秋看飛鳥氣和不減華林風  
韻高勝却霜巖曉心胷冰壺不隔塵爭傳落筆如有神  
不畫凌煙大羽箭來寫山林夢幻身清秀摩雲洞冰雪  
更將已素稱三絕不作能癡顧虎頭定爲露頂王摩詰  
傳神寫照誰與功吾聞成在阿堵中擬將萬匹鵞溪絹  
爲寫漚中勝義空



王仲誠舒嘯堂

隔岸莫山秋翠重少焉月作冰輪湧閑披白帟登此堂  
絳闕神清氣深穩齒應銜環舌卷桂兩鬢西風心一寸  
此中不著絲竹耳但覺清圓林葉動餘韻夫須百里聞  
風露清冥人跨鳳恐君夜殘亦仙去棄米叫雲空目送  
贈周廷秀

周郎南州俊毛骨特英拔結髮翰墨場聲光先逸發上  
書論國事人危泰山壓居然竄南陬風埃到鬚髮平生



拙生事寒饑坐曠達相逢湘水湄清甚等茗雲書近庾  
西臺詩如王右轄解尋磨衲禪仍領凌波襪春露試晴  
憲舌頰增脫活澆公剛直胷搜攪醫國法氣當宿玉堂  
絲絢八磚踏當分買山錢放關痛一掐

次韻吳興宗送弟從瀉山空印出家

身心俱出家豈復論家世一念斷攀緣即入三摩地珍  
重大願王此法端可恃若能訓此心是畢丈夫事君看  
宏覺師後身是曇諦儻欲貯甘露先將潔令器自當福



入天豈止能自利譬如雞出燖真復生厭離空印法門  
傑淨慈數高弟初不荷吾法亦自爲闕瑞汝能傾心事  
建此平生志淨中有浮念何異目有翳內外俱一如乃  
稱真正士以此談妙法要使天華墜百里半九十良醫  
三折臂果解信此言不媿甘蔗齋

張野人求詩

醉看湘山二十春杖藜疾趨旋路塵兒童拍手呼不住  
並行磨之不怒瞋人間禍福本無象引手按之如有神



草屨不踏公卿門街中玉石兩俱焚不知世上有憎愛  
一味但覺山林尊得錢行沽付一醉兒啼妻號了不聞  
孔仲山爲阿里卒吳門亦藏梅子真何年笑跨紫雲去  
舉手山頭謝世人

寄卻子中學句

剛踈觸時怒髮之投海山沛恩出意外縲囚遂生還湘  
西谷量雲結屋清蘋灣舉手弄雲水意適情自閑大藩  
英俊地翰墨相追攀聚話蘭叢秀吐氣雌霓彎我窮世



諱見所至特見刪但餘遭夫子時時客扣關邇來又識  
公喜忘雙鬢斑夷粹韻拔俗簡重語不煩人品有如子  
合在臺閣間歸來夢西津五峯解煙鬟故人訝歸晚負  
負媿在顏此詩雖夢語亦足發天慳乃知憂患烈不能  
鐫冥頑遙想爲一笑秀句出飢寒

子中見和復答之

世味嘗已徧譚著匿雲山爲問何能爾烏倦自知還湘  
西一千頃分我楊柳灣時爲理魚蓑人眠舟自閑公真



功名人高韻不可攀譬如秋無雲壁月挂一彎我詩聊  
寄耳猥語憑見刪峻句乃見辱嶮如履潼關細看秀爭  
發紅英微雨斑坐令十年心清涼去煎煩竹林在何許  
延頸佇望間遙知醉逃暑玉纖侍了鬟得句有奇趣笑  
渦印朱顏引紙欲續和自歎才澀慳應當恕不迨鄉閭  
念疎頑把卷味長哦松風嗽齒寒

次韻游衡嶽

結髮功名場吾豈厭朝市風埃浣袍袴樂事嗟無幾那



知望者闌舉手弄雲水山空答清嘯一洗風埃恥赤岸  
橫落日孤煙起墟里陰晴故多態風物自閑美歸來說  
佳處尚復喜見齒爲作鶴腦側失牀忘而趾平生嘉遁  
心衍挽車輪起拭涕師懶瓚多事笑曇始

次韻游方廣

萬峯纏煙霏一線盤空路丹楹出翔舞半在生雲處海  
人援臂上哀湍不堪泝夫子英特人自是幹國具醉耳  
厭絲竹來此良有故臨高賦新詩妙語發竒趣便欲抱



琴書亦作東家住山靈應拊掌笑公入窘步自當眠玉  
堂蓮燭夜枉顧偶此愛山爾戲語亦瓦注富貴本縛公  
雲泉寧可付置卷發遐想湘月微雲度

游白鹿贈大希先

昔人隱臨湘解跨白鹿游公來弔陳迹但有林壑幽春  
風掃夕陰雌霓飲澗湫披晴望形勝衣裾空翠浮道人  
高尻揖自陳語和柔烏猶爲人好草亦能忘憂矧汝家  
臨川共飲西津流欣然爲題詩清絕如霜秋詩成又自



錄小字如蠅頭意重恐難荷鄉義良已周遙乘知興耳  
興罷夫何求我和無好語效顰增嘆羞

次韻題兀翁瑞筠亭

大圓鏡空越數量是中豈容男女相風橐俱聲未易分  
前身後身翻覆掌種石王生硯出芝人亡物在何足奇  
請看襄母千里至庭竹駢根生瑞枝人言親少而子老  
異事相傳爭絕倒心法之妙傳以麤此理難與俗人道  
雲居的孫難共語辯如建瓴空氣宇不將雙腳踏城闌



卻侯詩句能寫真

次韻思忠奉議民瞻知丞唱酬佳句

兩詩清於玉堂卧氣如漢軍爭袒左高軒想見連璧來  
輾我門前碧苔破爲君哦此萬籟簧楚音變盡餘微些  
文章自然真吐鳳句拙見之那敢和高材要當萬錢食  
小邑折腰坐飢餓仲弓曾爲太邱令義方亦作吉陽佐  
丈夫功名未入手行樂莫嫌詩酒浼

次韻思晦弟雙清軒



門前無俗駕籬外有青山不出已成趣懶情心所安鳴  
鳩驚午夢意消風物閑可憐脩竹林遮我茅三間兄每  
緣詩來有時忘巾冠永愧隔壁呼東帶酬問端此詩可  
三復句挾風霜寒令人想見之恨身無羽翰壽子一杯  
水世隘軒獨寬

會福嚴慈覺大師

慈覺初見我背呼仰而應遂同宿湘上夜語如建瓴犀  
顚氣不驚虎領目有稜精彩類澄觀突兀掩萬僧喬嶽



占南極寒翠知幾層此老家此山親分漳水燈寶坊天  
雨華午梵盤清冥欲知法席盛但看道價增破夏出山  
來乃爾忘規繩蓋皮爲之灾公卿慕聲稱我幸無子累  
癡鈍人所憎平生寢飯外摩挲一枝藤少年入三吳題  
詩徧西興歸來舟彭蠡浪山雪崩騰匡廬落笑中萬疊  
橫空青又嘗游并汾趼足渡河冰衝虎上太行雞鳴見  
日昇此樂墮渺莽坐睡頭翳鬢竭來湘西塢倦鶴整羽  
翎只待秋風健祝融期再登



慈覺見訪余適渡江歸以寄之

黃沙橫吹意儻恍江色摸胡迷背向刺舟開岸風掠耳  
日莫歸來說驚浪旋添楫拙火蒙密堵立咨嗟羅少長  
椀櫟鏗然野炊熟井稅未輸夜春響少年信腳踏憂患  
幾同蚤叟埋煙瘴歸來閑散贖辛勤老住江村無雜想  
夢回書几有青燈雞一再鳴布衾暖遙想老禪讀此詩  
應作掀髯笑拊掌

次韻蘇通判觀牡丹



東風背立知誰家扶頭醉韻中流霞天涯也識洛陽面  
露叢幽藥生奇葩兩翁賦詩皆妙語讀之令人欲仙去  
坐間亦著白髮禪勝游且願追支許擁毳同看聊自娛  
春歸不肯略踟躕解空勿憶南泉老但言如夢不言無  
次韻元不伐知縣見寄

我讀元侯詩嶮若過驚浪忽於旋渦中濺雪湧千嶂又  
如曹征西唾手縛袁尚又如花間春熟視迷背向何從  
得此客要是萬夫望少年翰墨場開口取卿相低摧牛



刀中軒特見雅量君看風月湖自是無盡藏應手物華  
妙纖穠見情狀平生冥搜眼已照鮑謝上自當走奇勲  
豈止稱師匠嗟余衰退者那敢論輩行正如羊叔子堅  
卧答陸抗詩成急雨來掃盡層雲障重慚無傑句酬君  
語豪壯

和元府判遊山句

舉手弄雲泉濺衣作跳波側耳聞遺音仰看幽鳥過兩  
公作妙語清絕類陰何氣爽如南山晴嵐掩我我意快



如落瀑萬仞崩銀河秀如華林風嫣然散微和而余獨  
朴拙欲登選佛科十年類馬駒鏡謂磚可磨楓瘤或見  
取此事古亦多噪吻成綺語寧恤犯尸羅

送不伐赴天府儀曹

長沙解嶺海浩壤冠南楚豈止風物繁山水亦清富然  
以余觀之兩者未足數雖曰大藩地要以多賢故元侯  
汝潁奇家世工酌古竭來簿書中見此廊廟具三年令  
小邑野鶴剪翎羽側腦望雲漢奮躍思遠舉忽聞除書



至當得贊天府婢僕想京華一室譁兒女便覺馳鐸聲  
吹帽黃塵路舉首望絳闕金碧礙雲雨富貴闕  
馬氣成霧遙知念舊遊笑與同僚語  
天車

送友人

幽人獨負三尺琴自謂羲皇得意深經年不肯鼓一曲  
欲造千里求知音夕陽渡口西風起黃葉紛紛墜秋水  
送君默默上孤舟片帆忽舉風波裏此去吳中風物好  
重複江湖我曾到桂子落時雙澗秋白猿啼處孤松老



却入茗谿凡幾里連天震澤無窮已紅蕖苞拆流水香  
紫萼絲軟鱸魚美何時興盡見歸舟古今客路多飄流  
孤雲別鶴無蹤跡空聽蟬聲野渡頭

聽道人諳公琴

道人貌癯骨藏年漆瞳照人方而淵家住湘山湘水邊  
氣清日應嚼芳鮮羅浮飯石性所在定林飲澗老更堅  
予其徒歟寧果然抱琴過我亦自賢玉徽按抑朱絲絃  
借絃爲舌傳語言誰家恩怨餘妬憐綺窓鶯燕春風顛



顛風盤空攪蒼煙蕭蕭吹鬢人未眠清都絳闕斷世緣  
骨飛不到夢所傳秦箏心知是響泉置之髯鬚一笑掀  
藥珠三疊舞胎仙坐令遺世如蛻蟬何年醉騎紫雲去  
此琴枵然成棄捐

偈能禪三鄉俊宿山

湘西春色無人要萬頃鏡空飛白鳥小閣披衣眼力衰  
一聲款乃酬清曉芒屨閑穿聚落來此岸綠陰行不了  
南臺老未忘鄉井抵掌清談輒高笑烹茶煮筍未當勤



放意賦詩語奇峭此生何處不戲劇萬事隨緣真道妙  
何當借子西齋宿共看湘月千峯表

陪張廓然教授遊山分題得山字

先生如梁鴻德耀亦愛山湘西十日留笑語煙雲間弄  
泉石梅塢喚舟青蘋灣藉草飲松下松風當吹彈二妙  
生清妍山花挿雲鬟粲然起爲壽舞袖相翩翻先生墮  
幘醉頗覺天地寬醉語忽成詩爲題蒼壁顏城郭遙相  
望但見千峯寒



又得先字

青山隨處有見之輒欣然獨於湘上山欲買歸休田此  
邦多君子故欲吾終焉先生人品高白鷗春水前弟子  
亦秀發玉樹相明鮮頗怪翰墨場亦著白髮禪分題得  
難韻下筆風雷旋詩成愕衆口不復較後先閑中有此  
樂安用食萬錢紫芝愛陸渾遂爲好事傳悠然見眉宇  
寧復羨遺編

送廓然



長沙古都會何以冠荆楚但曰財富強山水最佳處那  
知號大藩寔以英俊聚張侯官雖冷藉甚有名譽心曾  
高崔嵬萬卷相撐拄君看逸羣姿矯不受控御罷官當  
北歸一室譁兒女想見馳鐸聲桑棗黃塵路倚馬草十  
制膽氣見眉宇此職誰當之夫子無媿負壁門黃金閨  
獨宿無晤語時應夢湘江醉卧聞柔櫓

大瀉山外侍者求詩

湘南古叢林鐘梵百世傳大圓百丈來縛屋巖石邊煥



然成寶坊服用如諸天經今成幾何已逾三百年誰爲  
中興者卓哉空印賢大鐘日夕撞圓音答山川衲子自  
成羣晝誦而夜禪道人舊未識眉目何淵然乞詩亦不  
惡篝燈臨網牋人生等浮雲達者無後先我亦一戲耳  
走筆成長篇

送珠侍者重修真淨塔

清涼寂滅塔三世無鮮陳歸然塵塵中現此光明身尚  
無有祖成寧當說有壞憫此情見者亦驚世議隘泐潭



道人珠願力無礙限行看蒼煙叢一切俱成辦狐死必  
首邱馬嘶必望北蓋皆不忘本人豈宜忘德秋風淨湘  
楚萬里浩無垠嗟予頽然卧羨子如孤雲

英大師年二十餘工文作詩勉之

英公南海來眉宇靜而淵少年辭海山脚力生雲煙已  
能弄翰墨句好自可傳君看嵩仲靈闕瘦聳清堅平生  
護教心光與星斗懸化去四十載凜然長在前文章一  
技耳幾不減市廛要求出世法道眼照人天吾言激後



生君俊無忽焉千峯開宿雨蒙頭作深禪古人亦何遠  
何必羨遺編

崇禪者覓詩歸江南

去年社燕前道人江南住一笑塞鴻來又在龍安浦今  
年寒食後歸心忽飄絮不知換秋菊能復如期否此生  
付浮雲忽散還復聚要之不可必恐作人間雨行藏類  
隱峯兩踏石頭路故山有遺恨缺典念馬祖落日頽金  
盆蒼茫煙水莫離情渺難收暮寫入凝佇



送悟上人歸瀉山禮覲

亂峯踴卓不容數寶構翔空盤萬礎瀉源水作青蓮香  
擲雷濺雪出煙雨住山老如大雄虎暗谷行藏文彩露  
說禪不費絲毫力以空為印印諸祖道人乃是小於菟  
氣已食牛難共語悠然蹤跡似孤雲羨儂先我山中去  
會當出鉢螺頂間見此頎然秀眉宇

贈珠維那

湘雲遮世路閑客此閑行彌日不忍去眷此山水清暖



憲欲春色茗碗雪花輕道人舊不識一見意已傾人主  
無根蒂聚散如流萍聊炷返魂梅將以熏道情此詩亦  
偶爾夫用四座驚

瑤上人求詩

道人江南來快作臨川語立談當夕照鄉閭問安否坐  
令十年心想見西津渡少年游諸方迺欲追佛祖清韻  
不可摹髣髴見眉宇豈止義中龍當作文中虎西風健  
行李暫會還徑去我如社後燕並立理歸羽

闕




雲風約聊復住勿長隱深谿當作人間雨

送瑤上人往臨平兼戲廓然

鶻瑤腦骨緊脚力健生雲疊數一萬里捷於臂屈伸肉  
佛不譏訶稱之迈云云坐誦覺範詩抄錄亦甚勤羣兒  
爭欺之僞雜以佗文瑤獨領不語飯沙俱一吞湘西雪  
達旦萬樹吐奇芬凍行如鷺鷥雪泥濺衣裾解包呵直  
指又作飢援蹲放意說臨平想見禪誦羣坐今冷齋中  
忽然變春溫明朝別我去掣肘徑出門便覺西湖月夜



坐生夢鬼



石門文字禪卷六